



Bler applaus per ils impedids suenter lur preschentaziun da teater.

FOTOS G. N. STGIER

Mintga impedì è er ina persunalitad

Cuira: Saira da beneficenza ARGOMente

DA GION NUTEGN STGIER / ANR

■ **Solidarità e simpatia senza fin da las radund 80 personas envers l'Argo, l'instituziun ch'occupa bunamain 400 personas cun impediments spiertals e corporals. Radund 15 000 francs van grazia a l'occurrenza en in fondo spezial da l'Argo.** Er la 7. ediziun da la saira da gala ARGOMente a favur da l'organiziun Argo è stada in success. S'inscuntrada è venderdi saira en l'auditorium da la Banca chantunala ina societad illustra per assister a l'occurrenza da beneficenza. Ina saira da gala cun buna musica e tragas finas en favur dal fondo da las activitads da temp liber da l'Argo. Cun esser ils 180 francs da l'entrada per in bun scopo han tuts pajà gudent quella summa. L'interpresa «Würth Itensis» ha sco gia ils ultims sis onns er sustegnì quest onn l'occurrenza cun ina summa pli gronda. Il vestgì musical a la saira ha dà la furmazion «acavoce», il sextett vocal da Domat, che ha gudagnà en in culp la simpatia dals preschents. Cun in repertori fitg vast han las duas dunnas ed ils quatter umens dà a la saira in caracter singular e procurà per anc daplì buna luna tar il public. Cun hits en-

conuschents da l'entir mund, dal 1980 fin al 2000, ha «acavoce» persvadi sin tribuna e confermà che chant vocal viva er tar nus. Tut en tut ina prestaziun che merita il predicat excellent.

Dependents da prestaziuns supplementaras

En ina moda cordiala ha *Ruedi Haltiner*, il mainagestiu da l'Argo, manà tras la saira ed attrag la simpatia dal public. A pled è er vegnì *Eduard Gasser*, dapi intgins onns president da la fundaziun Argo. «Cun esser da la partida a la saira da beneficenza mussais vus tuts solidaritad e simpatia envers las personas cun impediments spiertals e corporals», ha el ditg als preschents. Ils 400 impedids lavuran en in dals quatter lavuratori da l'Argo a Cuira, Casti, Glion e Tavau ed els èn tuts fitg dependents da prestaziuns supplementaras e savens tanschan quellas be per finanziar il da viver. Per finanziar il temp liber ed autras activitads da las personas cun impediments è l'Argo dependenta da la generusadad da blers. Uschè va er il retgav d'ARGOMente cumpletmain en quel fondo spezial per activitads sco vacanzas, sport ubain visitas a concerts. Cun finan-

ziar las activitads da temp liber grazia al fondo spezial vegnan ils impedids integrads pli bain en la societad, quai ch'è segir pli che positiv e plaschaivel.

Er ils impedids sin la tribuna

Nus rinforzain persunalitads, quai è stà il motto da la saira da beneficenza. Eduard Gasser ha lura er ditg che mintga persuna cun in impediment saja en ina furma u l'otra ina persunalitad. Er autras persunalitads, senza in impediment, hajan lur caracteristica e quai saja er il cas tar ils impedids da l'Argo. Savens saja tar ils impedids l'inabilitad da gidar sazez quella caracteristica e perquai dovrà els sustegn. Eduard Gasser ha er ditg che mintga impedi saja da gronda impurtanza. L'impurtanza da mintga singula persuna cun in impediment è lura er stada il tema central dal teater preschentà dad ina gruppa impedids da l'Argo Surava sut la reschia dad *Ines Denoth*. Perte sun jau impurtant, ha in impedi dumandà l'auter e lura er singulas personas en il public? Unisono ha lura il public respundi: Perquai che vus essas tuts simpatics, cordials, da buna luna e betg il davos vairas persunalitads.



Cant da bellezza da la gruppa vocala «acavoce».



Mintga visitader ha er retschet in regal dals impedids.



Elita Florin-Caluori, la presidenta dal cussegl grond, cun deputà Martin Wieland.



Trais dunnas da Surmeir tranter ils giasts: Karin Luzio, Graziella Luzio ed Ingrid Tanno (da san.).



Il mainagestiu da l'Argo Ruedi Haltiner (dretg) cun Nico Tgetgel da Lantsch, sesent a Ziran.



Cusseglia da citad Roland Tresp (san.) ed Eduard Gasser, president da la fundaziun Argo.